

■ URA DA DUMONDAS

Las bleras vischnancas infurmeschan ils migrants

(anr/fa) Deputadas e deputads novs e vegls han fatg ier viv adiever da la pussaivladad da far dumondas a la regenza grischuna. Pliras dumondas avevan da far cun il trafic e cun la glieud estra.

«L'integraziun da las migrantas e dals migrants vegn promovida tenor il princip 'promover e pretender' e sustegna surtut las purschidas per emprender la lingua, la carriera professiunala e la participaziun sociala», ha constatà la deputada *Christina Bucher-Brini* (ps, Cuira), «ultra da la lingua locala èsi però er impurtant dad infurmar las persunas da l'ester tar nus.» Ella ha dumandà cusseglier guvernativ *Christian Rathgeb* co che las vischnancas fetschian quai. Sco che Rathgeb ha ditg ha constatà il Post per l'integraziun chantunala che las bleras vischnancas hajan pront las brochuras en 17 linguas ch'il chantun ha stgaffi. «Ellas las dattan als migrants e'ls rendan er attent a la pagina d'internet chantunala che infurmescha en 12 linguas davart purschidas e lezias en lur nova dimora.»

«Laax na solidaric cun las autras vischnancas»

Il deputà *Bernhard Niggli* (pbd, Aschera) ha menziunà l'intenziun dal chantun da construir a Meiersboden, en vischinanza dal center da scolaziun da la Protecziun civila grischuna, in center per requirents d'asil. El ha dumandà sche quels centers possian vegnir manads senza problems l'in sper l'auter, sch'i na fissia betg meglier d'integrar il center da scolaziun en la caserna a Cuira. Rathgeb ha ditg ch'ins possia manar ils dus centers senza problems, «d'integrar in da quels en la caserna dentant fiss pli problematic.» En quel cas stuess il chantun pajar enavos la contribuziun federala da stgars 10,2 milliuns francs che la confederaziun aveva pajà l'onn 1973/74 per ereger il center da scolaziun da la protecziun civila. En connex cun las dumondas d'asil ha ditg il cusseglier guvernativ ch'il chantun haja l'intenziun da cuntinuar cun la strategia sco enfin uss: «Era sche quai fiss permess na prevezza quella strategia betg da surdar a las vischnancas la lezia da procurar e sorprender ils custs per l'alloschament dals requirents d'asil.» Laax na saja anc adina betg pront per il discurs cun il chantun en connex cun l'alloggi per requirents d'asil en il bajetg Ho-

tel Rustico, ha'l menziunà, «quai nun è in agir solidaric cun tshellas vischnancas grischunas.»

Plan d'instrucziun 21 vegn anc reponderà

La regenza da l'Argovia ha decis da suspender l'introducziun dal Plan d'instrucziun 21 (PI 21) en il chantun Argovia per trais onns. «Ha quai consequenzas per il chantun Grischun?», s'ha infurmà deputà *Andy Kollegger* (pbd, Cuira) ier a chaschun da l'ura da dumondas. Cusseglier guvernativ *Martin Jäger* ha respus da na, il chantun Argovia haja da far in'entira refurma structurala da sia scola. «Divers chantuns, tranter quels er il Grischun, han dentant pretais ch'i vegnian reducidas la finamiras da l'instrucziun cuntegnidas en il PI 21 per 20 per tschient.» La Conferenza svizra dals directurs da l'educziun publica vegnan a preschentar il PI 21 reponderà quest atun.

Posts da polizia electronics er en Grischun?

Christian Kasper (pld, Luzein) ha dumandà sch'i saja previs dad introducir er en Grischun uschenumnads posts da polizia electronics. «Il project Suisse ePolice duai porscher la pussaivladad als abitants en Svizra d'annunziar delicts, p. ex. enguladitschs, donns materials u disturbis dal ruaus, pli simpel via internet sin la plattafurma suisse-police.ch», ha declerà Christian Rathgeb, «fin uss han introduci las polizias dals chantuns Berna, Son Gagl, Turitg, Zug, Schaffusa e Friburg questa plattafurma electronica. Il chantun Grischun prevesa da far quai ils emprims da zercladur 2015.» A *Franz Sepp Caluori* (pcd, Cuira) che aveva vulì savair pertge ch'i vegnia en il radio proponì als automobilists da prender la ruta A13, cur ch'il traffic sa stagnia davant il Gottard, era sch'i sajan colonnas er sin quella via. Rathgeb ha respus ch'il management dal traffic saja in'incumbensa da l'Uffizi federal per las vias Astra: «La polizia chantunala grischuna renda attent a quel uffizi sch'il traffic cumenza a sa stagnar sin la A13, bler dapli na po ella betg far. Per evitar en avegnir grond traffic sin questa ruta tras il Grischun salida la regenza la construcziun d'in segund tunnel al Gottard.»